

[Augsburg], [um 15. Mai 1554]

An Johann Jakob Fugger

Druck: Demosthenes, Basel 1555, III, S. 3f.; Demosthenes, Basel 1572, III, S. 360.

AD MAGNIFICVM ET  
 generosum uirum D. IOANNEM IACO-  
 BVM FVGGERVM, Kirchpergae et Vueis-  
 senhorni Comitem, Caesareae et Regiae Maiesta-  
 ti à Consilijs, etc. HIERONYMI VVOL-  
 FII in tertium orationum Demosthe-  
 nis tomum Praefatio.

Has decem orationes, à quinque illis, quae secundo tomo attributae sunt, non aliud seuti, nisi enchiridij commoditatem, separauimus. Nam in his quoque causae aguntur, quae ad rempub[licam] pertinent. Ordinem eum reliquimus, qui in plerisque graecis codicibus habebatur. Nam cum de temporum serie, quibus singulae partim ab ipso Demosthene habitae, partim alijs scriptae sunt, non satis constare nobis quidem possit, nihil temerè mutandum existimauimus: praesertim cum in ea re non tantum momenti sit. Neque enim hinc Atheniensis Reipublicae integrum historiam contexemus: et satis est (quanquam ne hoc ipsum quidem necessarium) et genera causarum inter sese, et in forensi genere, priuatas actiones à publicis, utcunque separasse. Quod si, ut quaeque oratio uel argumenti dignitate, uel sententiarum uerborumqüe ornatu caeteris praestat, ita primo loco statuenda esset: uereor ut uel meum uel cuiusquam alterius iudicium ex aequo omnes probatui sint. Quare nobis non repugnantibus prima in hoc Tomo esto Leptinea, subtilissima, Cicerone iudice, oratio: in qua grauissimi loci tractantur, de honestate utilitati praeponenda, de gratia benemeritis referenda, de cauendis inquis legibus. In Midiana, Demosthenes in hominem diuitem et insolentem, cuiusmodi Romae fuit Ciceronis hostis P. Clodius, inuehitur: et quantum libertati discriminis ab istiusmodi monstribus impendeat, demonstrat. Androtionea monet, homines flagitosos à reibub[licae] gubernaculis repellendos esse. Aristocratea et Timocratea periculosis decretis et legibus resistunt. Theocrinea una, et contra Aristogitonem duae, sycophantas detestantur. Oratio contra Neaeram, impudicae mulieris exagitationem continet, quemadmodum Cicero Clodiam olim suam in Caeliana tractauit. Vltimo loco ponitur appellatio Eubulidea, in qua homo pauper contra hominis factiosi columnias defendit. Atque haec dixisse breuiter, inuitandi lectoris causa, sufficiat. Nam singularum orationum argumenta copiosius à Libanio exponuntur.